

# Poldi Filipaihidok pepa youyemguk

## Yodakale Mede

Poldi timentimenj hinek muwage ginej imenḡwan wapum folonj yaugē yaugē Yulop kwetneḡ wosuwaguk, uḡonj kwet faki niḡ wou Masedoniya, wendok maaneḡ yokwet wapum niḡ wou Filipai uḡonj wooḡ Mede Momoonj yohautaguk (Aposel 16.8-15). Mindanḡ yokwet wapum niḡ ginej wooḡ hatilune honeeḡ yot fafaḡeneḡ ginej dahigiḡ. Kanḡ yot fafaḡeneḡ ginej hali mede indij nadiguk, me nolidi kayonḡbop Filipai hatiḡḡwalaḡ nadisukilitihik tubugiyondane tiḡḡ. Unduḡ mintaguk kanḡ Pol adi wendoktiḡa nadibedi tuguk, iḡḡonj fiit Filipaihidok pepa youyemgukneḡ iḡonj kunali kanim adi tobo Pol adi Jesu nadisukiliti hinek timiḡḡuk doktiḡa nadifo tuguk.

Koom Poldi muneḡḡdok baniḡ tuguk kanḡ Filipaihidi tubulodagiḡ. Unduḡ doktiḡa pepa i youkukneḡ iḡonj adi titiḡ momoonj u tigiḡ wendok yeniutumba tiḡa youyemguk. Tiḡa unduḡonj, Pol adi yot fafaḡeneḡneḡ hakuk doktiḡa, tigene aditok nadiḡa welemulap tineneḡ doktiḡa nadisukilitihik tubufafaḡeyemguk.

Jesu Kilisto doktiḡa Bepaḡḡdi hatihati kobuli silonj tiyemguk, wendok maanḡ Poldi yenindakaleguk. Indij yeniḡḡuk. Hidi Judahi'walaḡ Yodoko Mede tagimneeḡ hatihati kobuli u mu kahilegiḡ. Mokoḡ. Adi Jesu Kilisto doktiḡa kahilegiḡ. Unduḡ doktiḡa Poldi Jesu Kilisto'walaḡ titiḡ uḡak takaliyaneḡḡdok yeniḡḡuk. Jesu Kilisto ne adi wougigitnit unduḡ yoḡa ne'walaḡ nadinadi mu takaliguk. Mokoḡ. Adi yadi netok nadiune founē Bepaḡḡdi kwanai miḡḡuk u tuguk. Poldi indij yoguk. Metam nediyeḡ Kilisto dut galikwambunda hinek tiḡḡ, adi yadi nadifo loloḡnit hinek tiḡḡ.

Indi pepa i kunali kanene indij mintawek. Pol adi Filipaihi metam kayonḡbop mintaanḡ hatigiḡ heki u welenḡḡi hinek yabukahile tuguk.

---

## Mede yokahaḡ

**1** <sup>1</sup>Pol eḡ Timoti, Kilisto Jesu'walaḡ tipilapilaye-me indi, meeniḡ hogohogok Filipaihi Kilisto Jesu nadisukilitimiḡḡ eḡ talitimenḡhiye eḡ kayonḡbop hehitubu-lodadok me hatiḡḡ heki hiditok wanaḡ nadiḡa pepa i kameyamut. <sup>2</sup>Betnik Bepaḡ eḡ Wapum Jesu Kilisto

adi'walaaniŋ siloŋ tobogoŋ eŋ kulema hidi'walaŋkade haliwoon hatuwaak.

### **Poldi Filipaihi metamdok welemomooŋ nadiŋa Bepaŋ niutumbaguk**

<sup>3</sup>Nu hiditok nadisulat tuwot Bepaŋne niutumbalat. <sup>4-5</sup>Hidi Mede Momoon nadiŋila uŋaniŋgoŋ indigut kiula kwanaiŋiŋ hati titalabiŋ. Ala unduŋ doktiŋa Bepaŋ ninadilat tuwot hidi hogohogok wanaŋ welemomooŋ nadihamuŋa Wapum hati niutumbalat. <sup>6</sup>Tiŋa indiŋ nadikwambundalat, kwanai momooŋ hidi'walaŋkade tububihikuk uyadi uŋgoŋ titauyeŋ tubudapmalune Jesu Kilisto busuwadok naiŋiŋ dulawaak.

<sup>7</sup>Nu hiditok wanaŋ hogohogok nadihambene tuwot tilak. Nu Mede Momoon doktiŋa yot fafaŋeniŋ gineŋ napmeiŋ be Mede Momoon wondok mede kwanai tiŋa ulihilat kaŋ hidi hogohogok nehitubu-lodaan nehikasopneiŋ doktiŋa indi wanaŋ Bepaŋ'walaŋ siloŋ tobogoŋniŋ gineŋ noŋgoŋ kwanaineyam. <sup>8</sup>Jesu Kilistodi siloŋ tobogoŋ tinimilak, nu wendok foloŋ ulodiŋa hiditok walane kolongoŋ yatak. U Bepaŋdi nadilune biyagoŋ yolat. <sup>9</sup>Tiŋa welesiloŋhikdi nadisuhik be nadidakalehik tububedihamdok hati ninadilat. <sup>10</sup>Kaŋ hidi nemek folooŋ hinek halaak u kakiyondaneŋ. Eŋ Kilisto busuwabusuwaŋiŋdok nadisuŋa welehik tubutakaleŋ walaŋiŋ hinek, yomnit mokit hatiyaneŋ. <sup>11</sup>Unduŋ tubune Jesu Kilistodibo hehitubu-kilitiune titiŋ momooŋ diniŋ folooŋ duhuduhunit tubumintaneŋ kaŋ metamdi habuŋa Bepaŋ niutumbaŋ wougigit yotiloyaneŋ. U biyagoŋ.

### **Nolidi kinintifo tiŋa Bepaŋ'walaŋ mede yogiŋ**

<sup>12</sup>Notneye, hidi dediŋ yoŋa nadineeneŋ doktiŋa indiŋ hanimbit. Nu iŋoŋ nemek mintananguk woŋ adi Mede Momoonŋdi kedem hautadok unduŋ mintaguk. <sup>13</sup>Nu Kilisto doktiŋa yot fafaŋeniŋ gineŋ itat. Mede wendi iŋoŋ kiyap eŋ mikme heki eŋ metam noli'walaŋ magihik gineŋ foune agaŋ nadidapmagiŋ. <sup>14</sup>Tiŋa yot fafaŋeniŋ gineŋ ituwene iŋahi notniye feedi Wapumdok nadisuŋa lodaan Bepaŋ'walaŋ mede yohautagiŋdi nai indinde adi hautakut hinek tiŋa saŋiniŋnit yohautaiŋ. <sup>15</sup>Kaŋ me nolidi nutok nadikadaka tiŋa nehitifofonŋ tine Kilisto'walaŋ mede yohautaiŋ, eŋ nolidi welekulema foloŋ yohautaiŋ. <sup>16</sup>Adi yohautaiŋ uyadi nu iŋoŋ haliŋila Mede Momoonŋ tubulodalat wendok welesiloŋ tinamuŋa yohautaiŋ. <sup>17</sup>Eŋ nolidi yalaŋ tiŋa nehi'walaŋ wohiyedi loloŋdok Kilisto wou yohautaiŋ. Unduŋ tiŋa yot fafaŋeniŋneŋ malabumuŋ noli tomboyoula namdok unduŋ tiŋiŋ. <sup>18</sup>Kuŋgoŋ mede yalayalaŋ be biyagoŋ yoneŋ wendok maŋgoŋde wapumgoŋ yodok. Kilisto'walaŋ mededi hautalak wendi folooŋ tilak, unduŋ mintalak doktiŋa welemomooŋ nadilat.

### **Pol adi hatidok be kumudok kedem hogok yoguk**

<sup>19</sup>Tiŋa indiŋ yoŋa helemahemaŋ welemomooŋ nadiluwaat. Hidi nutok tiŋa ninadi kwanai tubune Jesu Kilisto'walaŋ Munabulidi nehitubu-

lodaune yot fafaŋeniŋ gineniŋ fooŋ baat. <sup>20</sup>Tiŋa undugoŋ meka mu tibaat unduŋ nadiwene dapmahinakaune walanedi wendok nadikunakunale tihatuluwaat. Kumuŋ tibaat be kaipmuŋ hatiŋila nemenemek tibaat hogohogok u saŋiniŋnit titabugut undugoŋ titauluwene wendi Jesu Kilisto wougigitŋiŋ yohautaluwaak. <sup>21</sup>Kaipmuŋ hatilatneŋ u Kilistodi hatihatine unduŋ tilak, ala kumumbaatneŋ adi nemek momooŋ hinek kahilewaat. <sup>22</sup>Be kwetfoloŋ kotigoŋ nobu tomboyoula hatibaat, adi kwanaine diniŋ folooŋ tubumintawaat. Unduŋ doktiŋa deenŋdok lodawit yoŋa welelufom tilat. <sup>23</sup>Nu yadi niŋdok be niŋdok wanaŋ nadilat. Kwet bikabuŋa looŋ Kilisto tubumintaŋ adut hatidok mohinek nadilat. U hinek adi nemek loloŋnit. <sup>24</sup>Iŋgoŋ hidi hehitubu-lodadok adi loloŋnit hinek doktiŋa kwetfoloŋ kotigoŋ tomboyoula hatibene tuwot tibaak. <sup>25</sup>Ala unduŋ doktiŋa indiŋ hinek-ku nadikwambundalat. Nu yadi mu kumuŋa hidigut hatiluwaat, unduŋ tibene nadisukilitihik bediune welemomooŋ nadiŋa hatineeŋ. <sup>26</sup>Eŋ hidi'walaŋkade kotigoŋ wooŋ hatibene nutok tiŋa Jesu Kilisto niutumbaiŋ undugoŋ helemahelemaŋ niutumbyaneŋ.

### Gigine tiŋa kiulihi titiŋdok

<sup>27</sup>Nemek niŋ adi indiŋ. Metam hogohogok namandahik foloŋ adi Kilisto diniŋ mededi yolak wendok tuwolit hatiyaneŋ. Unduŋ tiŋa welekubugoŋ tiŋa kifolok eŋ kiulihi tiŋila Bepaŋ'walaŋ Mede Momoonŋdok gigine kwanai tihatilune buŋa habaat. Be kwatnaŋgoŋ hatiŋila kahathik nadiwaat. <sup>28</sup>Kiulihi tubune memikhiyedi hanimuntamuntaye tubune saŋiniŋhik gweheye tiŋa mu fiyakulaak. Unduŋ tubune Bepaŋdi adi yehitubu-kadakaŋ hidi hanagilaak wendiniŋ mebi mintadakalewaak. <sup>29</sup>Bepaŋdi Kilisto nemek timiŋdok nadihamuŋguk u yadi nadisukiliti hogok timiŋdok mu yoguk, moŋ. Adi tobo aditok tiŋa folofigita gineŋ hatidok wanaŋ nadihamuŋguk. <sup>30</sup>Unduŋ doktiŋa nu koomkwaha folofigita kwanai tibene nabuŋiŋ eŋ nai indidegoŋ tibene kahatne nadiiŋ, undugoŋ hidi maŋ folofigita kwanai undiniŋgoŋ tiŋiŋ.

### Welekubugoŋ tiŋa siloŋ kibikibi titiŋdok

**2** <sup>1</sup>Kilistodi niniŋkiliti tiŋa welesiloŋ eŋ welekulema nimilak, tiŋa kulema eŋ siloŋ tobogoŋ maŋ nimilak, kaŋ Munabulidi welenik gineŋ menot tinimilak, <sup>2</sup>unduŋ doktiŋa hidi titiŋ fofooŋ hogohogok tubune nu'walaŋkade nadifodi tokihinakawek. Nadinadihik kubugoŋ tiŋa welehiŋdi me noli yabukahileeŋ menot titiŋ eŋ munabuli gineŋ bop kubugoŋ tiŋa welekubugoŋ tiyaneŋ. <sup>3</sup>Hidi hidetok hogok nadiŋa sigitilo foloŋ nemek mu tiyaneŋ. Niŋ adi netok nadiune fofooŋnit tubune noliŋiyedok nadiune lowaak. <sup>4</sup>Tiŋa nebek niŋ adi nemek ne'walaŋ utumbadok hogok mu nadiluwaak. Noliŋiye'walaŋ maŋ utumbadok nadiluwaak.

### Jesudi talitimeŋ tinimiŋa ninindidimeguk uŋakoŋ keledok

<sup>5</sup>Kilisto Jesu'walaŋ nadisu hakuk undugoŋ, hidi'walaŋdi maanŋ hatuwaak. <sup>6</sup>Jesu adi Bepaŋdok tuwolit hatigukdi Bepaŋdok tuwolit hatilat u deti wabiwit unduŋ yoŋa hatihatiniŋ mu kahileguk. Moŋ. <sup>7</sup>Adi yadi hatihatiniŋ kwihija kameeŋ tipilapilaye-medok tuwolit tuguk, eŋ titiŋniŋ kaune meeniŋdok tuwolit tuguk. <sup>8</sup>Adi foforŋit tiŋa hatiŋila mede tiloloŋ talik keletaŋyeeŋ kumuŋguk. Koloŋdabek foloŋ kumuŋ u mekaŋgoŋ iŋgoŋ fiit kumuŋguk. <sup>9</sup>Unduŋ tuguk doktiŋa Bepaŋdi nagitiloŋ wapum loloŋnit hinek kambiyaliŋa wou loloŋnit niŋguk u noli hogohogok yalakapmedapmaŋ tilak. <sup>10</sup>Unduŋ doktiŋa kunum gineŋ be kwetfoloŋ, be kwet falipmeŋ hatiŋiŋ wanaŋ hogohogok Jesu mulelem timiŋa wou nintilodok. <sup>11</sup>Tiŋa undugoŋ meeniŋ hogohogok adi mahikdi Jesu Kilisto adi Wapum hatilak, unduŋ yohautayaneŋ. Kaŋ yonadifo wendi Baŋ Bepaŋdok gigit tuluwaak.

### Indi'walaŋ titiŋ momohidi metam welehik maaneŋ hauta tubumintayemuluwaak

<sup>12</sup>Notneye momohi, hidi helemahemaŋ mede tiloloŋ tiŋiŋ, uyadi nu hidut hatiluwene tigiŋ, ala niŋkade hatiluwene u maanŋ momooŋ hinehinek undugoŋ takaliŋa tiyaneŋ. Hidi agaŋ Bepaŋ'walaŋ hatihati kahilegiŋ, iŋgoŋ kadakanŋ tineeŋ doktiŋa nadimuntaŋ hehele tiŋa nemek folooŋ hinek hamdok yoguk u kahiledok fafaŋe kwanai taneŋ. <sup>13</sup>Biyagoŋ kuyoŋ, Bepaŋ negoŋ welehik gineŋ hehitubu-lodaune lodaloda tiŋa adi'walaŋ nadinadiŋiŋ kedem takalidok saŋiniŋ hamulak.

<sup>14</sup>Hidi nemenemek hogohogok tiŋila kiyomunumunuŋe eŋ tosiwe mu tiyaneŋ. <sup>15</sup>Tiŋa undugoŋ yomnit mokit eŋ welehik walaŋiŋ hatiyaneŋ. Unduŋ tiŋa metam noli titiŋhik hogohi u mekanit mokit tifiŋ tiŋiŋ, adi'walaŋ mambip gineŋ hidi Bepaŋ'walaŋ wapmihidi welehik hautanit hatiŋila hinantilamek undiniŋ hautayaneŋ. <sup>16</sup>Mede hatihatiniŋ uyadi gitagoŋ mongo hatiŋila yenihautayaneŋ. Unduŋ tiŋa hatigene kougoŋ Kilisto busuwawaakneŋ, folofigita nadigut eŋ kwanai tugut wendiniŋ folooŋ mintaune welemomooŋ nadiwaat. <sup>17</sup>Nadisukilitihikdi Bepaŋdok dumuŋ hemiŋ unduŋ tilak. Eŋ nu'walaŋ nanŋatnedi wain ime nabugoŋ hidi'walaŋ dumuŋ hemiŋ foloŋ nobu yougombaak, iŋgoŋ nu wendok nadifo tibaat.<sup>a</sup> Nu hidigut nadifo tibaat. <sup>18</sup>Eŋ hidi maanŋ, wanaŋaŋ hogohogok, nukut nadifo tiŋa welemomooŋ nadieneŋ.

### Pol ne Timoti Filipaide niŋkulu uuŋdok yoguk

<sup>19</sup>Wapum Jesudi nadiune tuwot tubune pilap hinek Timoti hidi'walaŋkade niŋkule uuŋdok yolat. Ala hidi'walaŋiŋ mede kahat

<sup>a</sup> 2:17 Judahi adi indiiŋ tagiŋ. Dumuŋ hemiŋ tiyagiŋ foloŋ wain ime yougomiŋagiŋ. Eŋ Poldi unduŋ foloŋ kamekaŋ ne yot fafaŋeniŋ gineŋ halune ulukumuneŋ be fiyakulune fowaak u mu nadiŋa welelufom foloŋ youkuk.

nij beja buja nanimbune nadija walane kulemawaak. <sup>20</sup>Me nij adi undiniņ noli nimaangon nemu hatinamiņ. Adi hogokdi biyagon hinek welenđi hehiulihwaak. <sup>21</sup>Meeniņ noli adi nehi'walaņ kwanaidok hogok nadija Jesu Kilisto'walaņ kwanaidok mu yoiņ. <sup>22</sup>Timoti adi hatihatiniņ diniņ mebi agaņ nadiņ. Mihi niņđi beu tubulodalak undugon adi nu Bepaņ'walaņ Mede Momoon kwanaidok nehitubu-lodalak. <sup>23</sup>Kaņ nu na'walaņkade nemek unduņ be unduņ mintawaak u nadididimehinakaņ adi-ku pilap kamewe waak. <sup>24</sup>Tiņa undugon Wapumdi nadinambune na maan denimbek hidi'walaņkade waat. Unduņ nadilat.

### Epafoloditus'walaņ mebi

<sup>25</sup>Nu nemenemek lohiņa hatiluwene hidi Epafoloditus niņkulune buja nehikasopneguk. Adi yadi notne eņ kwanai nonņonņ tiyamut eņ mik wendok gineņ kikasop tiyamut. Ala adi fiit kotigon niņkule hidi'walaņkade bubuņđok yolat. <sup>26</sup>Adi yagit tubune mede kahat nadigiņ, ala aditok nadibedi tineeneņ yonņa welemulap tilak. Unduņ doktiņa wooņ habudok hinek nadilak. <sup>27</sup>Adi yadi yagit malabumuņ tiņa kumuņdegoņ tuguk, kaņ Bepaņđi bulaningon nadimiņa tubulodaguk. Tiņa adi hogok moņ. Nu maan aditok tiņa bulaningon helemahemaņ nadiwaatneņ doktiņa walane tubukulemaguk. <sup>28</sup>Ala hidi adi kaņ, welemomoon nadineeņ, eņ na maan nadibedit mokit hatidok nadiņa Epafoloditus mu kamekibidalat, moņ. Tobo pilap kamewene ulak. <sup>29</sup>Ale usuwaune welemomoon nadimiņa Wapum doktiņa nadifo tineeņ. Biyagon kuyon, hidi me undiniņ u welemomoon nadimiņa tubulodayaneeņ. <sup>30</sup>Adi yadi Kilisto'walaņ kwanai doktiņa kumumbe tuguk. Hidotok kibikon ne hogok tipilapilaye tinamuņa kumuņdegoņ tuguk.

### Bepaņ Medeniņ yotubufit tiņ adut mu kadidok

**3** <sup>1</sup>Notneye, niņbo yobe. Wapum doktiņa nadifonit hatiyaneeņ. Mede komi uņakoņ kiliki youhamdok nadiwene malabuda mu tilak, ala wendi hidi hehitubu-kilitiwaak.

<sup>2</sup>Hidi adi kamo moiņ heki hatiņneņ ale kikadoko tiyaneeņ. Biyagon kuyon, meeniņ nadisukiliti tubufit kwanai tiņila sigihik foloņ Judahi'walaņ fek tihatiņ aditok dauhik diweņila hatiyaneeņ. <sup>3</sup>Biyagon hinek kuyon, metam nadisukilitihini indi siginik diniņ kwanai wendok nadihaņinda tine Bepaņ'walaņ Uņgoniņ Munabulidi nihitubu-lodaune niutumbaāņ Jesu Kilisto wou nintiloyam, indi yadi Bepaņ'walaņ fek foloņ hinek moņgo-hatiyam.

<sup>4</sup>Nu na maan, sigine foloņ ulodilit binek, adi meeniņ nolidi sigihik foloņ ulodiņ u yalakapme tiņa tilit. <sup>5</sup>Nu mintaāņ halene melenai 8 tubune foloone diki gitnem foloņ Judahi'walaņ fek tinamgiņ.<sup>b</sup> Nu yadi Isilaeniņ, Benjamin

<sup>b</sup> **3:5** Judahi'walaņ Yodoko Mededi indini yolak. Mihi mintauene melenai 8 tubune nai uņaniņ foloohik diki gitnem foloņ fek dobyemdok.

diniŋ yalaki. Biyagoŋ kuyoŋ, nu yadi Judame doktiŋa Hibulu mede be titiŋhik u agaŋ nadilat. Tiŋa undugoŋ Yodoko Mede diniŋ mebi ki Falisi me hatigut. <sup>6</sup>Nu gigine hinek tiŋa Jesu'walaŋ kayoŋbop mik-kwadi tiyemilugut. Unduŋ tiŋa Yodoko Mede foloŋ me didimeniŋ eŋ yomnit mokit hatigut.

**Pol adi Kilisto kahiledok nadiŋa nemenemek  
hogohogok u gilegilem yoŋa sigilulum tiyemguk**

<sup>7</sup>Kaŋ nu nemenemek hogohogok behatiŋa nadiwene folooŋ tuguk, uyadi mindaŋkade Kilisto doktiŋa nadiwene folooŋnit mokit tuguk. <sup>8</sup>Kaŋ nu Wapumne Kilisto Jesu'walaŋ mebi kanadi tiŋa nadidakaleeŋ nadiwene Wapum loloŋnit hinek tubune nemenemek koom tihatilugut wendok nadiwene folooŋnit mokit tilak. Nu Kilisto kahiledok nadiŋa nemenemek hogohogok u nadiyembene gilegilem tubune bekudapmagut. <sup>9</sup>Nu Yodoko Mede tiŋaloŋ adi'walaŋkade kadiwene yomne dapmanamdok moŋ. Adi tobo Kilisto nadisukilitimiŋa yomnit mokit titiŋ wendok adi momooŋ hinek nadilat doktiŋa nadisukilitinit hatibene Bepaŋdi yomne tumolokutnamulak. <sup>10</sup>Unduŋ tiŋa nu Kilisto walanedi menot timimbene pilapilatŋiŋ diniŋ saŋiniŋdi nu'walaŋkade meŋeune folofigita nadiguk undiniŋ u nu maŋ adigut tomboyoula nadiwaat. Unduŋ tiŋa uuyeŋ adi Bepaŋ'walaŋ mede takaliŋa kumuŋguk undugoŋ tibaat. <sup>11</sup>Unduŋ titauuyeŋ kumuŋ gineniŋ maŋ kaikaŋ pilalaatdok nadilat.

**Feknik momooŋ hinek kamenimguk wendok nadigigineeŋ hatiyaneeŋ**

<sup>12</sup>Nu Kilisto'walaŋ titiŋŋiŋ u agaŋ kahilehinakaŋ me momooŋ hinek mintagut, unduŋ tuwot mu yobit. Mokoŋ! Nu adi toboniŋ Jesu Kilistodi nanagikuk undugoŋ nubo adi'walaŋ titiŋŋiŋ u kahilehinakawit yoŋa helemahemaŋ fafaŋe kwanai tilat. <sup>13</sup>Notneye, nu titiŋ u agaŋ kahilegut unduŋ adi mu nadilat. Inŋoŋ nu nemek kubugoŋ niŋ nadilat adi indii; nemenemek hogohogok koom titalabugut u yadi kauleyem titiŋdok nadilat. Unduŋ tiŋa nemek kougoŋ baak u kahiledok wendok fafaŋe kwanai tilat. <sup>14</sup>Unduŋ tiŋa Bepaŋdi Jesu Kilistodok tiŋa kunum gineŋkade nanihamaneeŋ fek foloŋ hinek tinahukut momooŋ kamenamguk u tubumintadok daunedidimeniŋgoŋ diweeŋ kaŋila kiyanelat.

<sup>15</sup>Agan bedinaditum tugumun indi yadi nemek wendegoŋ nadigigine tihatianeem. Ala nemek niŋdok nadiune tali niŋ nobu tuluwek kaŋ Bepaŋdi welehek tubuhautaune nadidakaleneeŋ. <sup>16</sup>Talik dibek keleeŋ hatitabugumun uŋakoŋ hogok keleeŋ hatiyaneeŋ.

**Indi yadi kunum yokwet wondiniŋ folooŋ**

<sup>17</sup>Notneye, nu timenŋ tihamuŋa wene nabaŋa uŋgoŋ nehikeleeŋ uneeŋ. Eŋ meeniŋ nediyeŋ indi'walaŋ titiŋ keleiŋ adi maŋ dauhik

diweej didimeningon yabuja yehikeleyaneej. <sup>18</sup>Meenij nolidok hati haniṅtabugut, eṅ yon adi makat kobulabulaye tiṅa kotigon hanimbit. Adi yadi Kilisto kolonḡdabekṅij mik-kwadi timiij. <sup>19</sup>Biyagon kuyon, meenij undihi adi liwe tineej. Adi yadi bombon foloohik ulihilak wondok nadiune bepaṅhik tilak, eṅ nemek mekaṅdok welemomoon nadiij. Eṅ kwet diniṅ bombonḡdi nadisuhik hamanedapmalak.

<sup>20</sup>Eṅ indi yadi kunum yokwet wondiniṅ foloon, unduṅ doktiṅa Wapumnik Jesu Kilistodi foon ninigitdok wondok woom hatiyam. <sup>21</sup>Adi yadi meenij be nemenemek hogohogok u yehitifoon ne'walaṅ falipmeṅ boidok saṅjiniṅ halimilak. Eṅ saṅjiniṅ wondigon foloonik fofonit u tubukaikaan tubutakaleune ne'walaṅ folonamandap undiniṅ hautaṅ eṅ holiholiṅenit tibaak.

**4** <sup>1</sup>Unduṅ doktiṅa notneye kedehi, hidi Wapum'walaṅkade undugon hinek ulodikwambundaan yatneej. Biyagon kuyon, walanedi hinek habukahilelat. Hidotok nadifo tilat, maṅgoṅde hidi yadi nu kwanai tugut diniṅ foloon. Hidi notneye kedehi hinek doktiṅa mede i haniṅkiliti tilat.

#### **Tamyat adi Kilisto'walaṅ nadisu keleen welekubugon titiṅdok yeniṅkilitiguk**

<sup>2</sup>Tamyat Yuodiya eṅ Sintiki, hidi Wapum doktiṅa welekubugon tiṅa hatidemek hanilat. <sup>3</sup>Eṅ notne momoon, kwanai yendok kiulih tiṅa tamut, du tamyat u yabu-ulidokowaan. Tamyat adi eṅ Kelemen eṅ notniye nolidi Bepaṅ'walaṅ Mede Momoon kwanaidok nehiulihigiṅ. Adi'walaṅ wohiye adi hatihati fafaṅeniṅ diniṅ pepa mebinit gineṅ hatak.

#### **Wele tubukaika diniṅ mede**

<sup>4</sup>Hidi Wapum doktiṅa welenadifo tiṅa hatiyaneeṅ. Nu koti haniṅgigineej yolat, welehiḡki nadifo tiyaneeṅ. <sup>5</sup>Wapumdi nihitubu-dulalak doktiṅa meenij hogohogok kulemaṅgoṅ tiyemaneej. <sup>6</sup>Nemek wendok be wendok nadibedi mu tiyaneeṅ. Hide'walaṅ welehiḡ diniṅ nadinadisu mebimebi u Bepaṅ welemomoon nadimiṅa ninadiṅila nihautayaneej. <sup>7</sup>Kaṅ Bepaṅ'walaṅ kulema meenij indi'walaṅ nadidakalenik kalakapmedapmalak wendi nadinadisuhik eṅ welehiḡ yehikiulune Jesu Kilisto'walaṅkade fafaṅeniṅ hatuwaak.

<sup>8</sup>Tiṅa notneye, mede niṅ maan indij yobit. Nadinadihiḡ momoonḡgoṅ hinek kadokoyaneej. Nemek foloon eṅ nemek gikiṅgoṅ timindok, tiṅa nemek didimeniṅ eṅ nemek waliniṅ, tiṅa nemek kagalika titiṅdok eṅ nemek nadigalika titiṅdok, tiṅa nemek tubune utumba hinek titiṅdok eṅ nemek welemomoon nadidok, nemek wendok adi gigne tiṅa nadiṅila hatiyaneeṅ. <sup>9</sup>Nu nemek hanihehitubu-didime eṅ hanindakalewe kanadi tigiṅ uṅakoṅ beṅa tihatibune Bepaṅ kulema molomdi hidigut hatibaak.

#### **Poldi Bepaṅ'walaṅ kwanai malabumuṅ tiṅila kedem hatiguk**

<sup>10</sup>Hidi nai kabe-kweheyeniṅgoṅ hatitaloloyeeṅ nutok kotigon nadisua welesiloṅhik doktiṅa muneej bombonḡdi siloṅ tinamgiṅ,

wendoktiŋa Wapum'walaŋkade kadiŋa welemomooŋ wapum hinek nadilat. Hidi nutok u biyagoŋ hinek nadigiŋ ala nemek namdok u talik youka tiŋa malabudagiŋ. <sup>11</sup>Nu yadi nemek tinamdok haniŋguluguluŋe tiŋa mu yolat ale, nu yadi unduŋ be unduŋ hatiŋila nadikadaka mu tiŋa welekulema gineŋ hatilat. <sup>12</sup>Nu bomboŋ mokit hambeep hinek hatilatneŋ be bomboŋnenit hatilat, nai uŋaniŋ nu adi kulemaŋgoŋ hatilat. Nu kulemaŋgoŋ hatihati diniŋ mebi u agaŋ nadilat doktiŋa nanajeŋe fee itnamiŋneŋbe, be map tilatneŋbe, be nemenemek tuwot ikiŋneŋbe, be baniŋ tilat, iŋgoŋ nu nai uŋaniŋ wenedi kulemaŋ halune gitagoŋ hatilat. <sup>13</sup>Kilistodi saŋiniŋiŋ nambune fafaŋelat aditok tiŋa hatiŋa unduŋ tibene tuwot hinek tubudapmalak. <sup>14</sup>Iŋgoŋ oŋ, hidi yadi bulaniŋgoŋ tiŋa malabumuŋnit hatiluwene nehitubu-lodagiŋ doktiŋa nadihambene utumbalak.

### Pol siloŋ timiŋgiŋ

<sup>15</sup>Filipaihi hidi agaŋ nadiiŋ. Nu timentimeŋ Bepaŋ'walaŋ Mede Momooŋ hanihautawene nadisukilitigiŋ, nai uŋaniŋ Masedoniya kwet bikabuŋa uluwene kayoŋbop noli adi hogok hatilune hidi hogok tububihila nehiulihigiŋ. <sup>16</sup>Tiŋa Tesalonaika yokwetneŋ hatiluwene nai fee sigiŋ diniŋ bomboŋdi nehiulihigiŋ. <sup>17</sup>Nu yadi muneŋ bomboŋdok mu yolat, adi tobo siloŋ tobogoŋ tigiŋ wendok Bepaŋdi kibikoŋ tihambaak wendok yolat. <sup>18</sup>Yoŋ adi nemenemek agaŋ bedapmagut tiŋa fee behatilat. Epafoloditusdi hidi'walaaniŋ nemenemek bebuŋa nambune bomboŋnit tugut hatilat. Hidi nutok nemek tinamgiŋ wendok nadiwene Bepaŋdok muni munduŋ momooŋ hemimbune adi kaune utumba tilak. <sup>19</sup>Bepaŋne adi duhuduhu tubumintalakdi hidi'walaŋ baniŋhik kaŋ Jesu Kilisto doktiŋa nemek momooŋ u duhuduhu loloŋnit hinek ne'walaaniŋ hambune hatiyaneŋ. <sup>20</sup>Bepaŋ Betnik adi'walaŋ wougigit loloŋnit u haliwooŋ halaak. U biyagoŋ.

### Mede yodapmaŋ

<sup>21</sup>Nu Kilisto Jesu wou foloŋ youtumba mede kamehamulat, uyadi meeniŋ nadisukilitihinit yenindapmaneŋ. Eŋ notneye nukut hatiyam adi maŋ youtumba mede kamehamiŋ. <sup>22</sup>Metam nadisukiliti tiŋ hogohogok eŋ Mapme Wapum Sisa'walaŋ kwanai-me mebimebi nadisukilitihinit adi maŋ youtumba mede kamehamiŋ. <sup>23</sup>Wapumnik Jesu Kilisto'walaŋ siloŋ tobogoŋdi hidi'walaŋ welehiŋ eŋ munabulihik gineŋ hatidapmaluwaak. U biyagoŋ.